

**PEMBERITAHUAN PERTANYAAN DEWAN RAKYAT
JAWAPAN OLEH YB DATUK SERI DR. S. SUBRAMANIAM
MENTERI KESIHATAN MALAYSIA**

PERTANYAAN : LISAN
DARIPADA : YB DATO' HAJI MOHD ZAIM BIN ABU HASAN
[PARIT]
TARIKH : 24 MAC 2014
SOALAN :

YB Dato' Haji Mohd Zaim bin Abu Hasan [Parit]minta MENTERI KESIHATAN menyatakan :-

- (a) berapakah jumlah pesakit warga asing yang telah dikenal pasti membawa pelbagai penyakit berjangkit ke Malaysia mengikut tahun semenjak tahun 2008 hingga sekarang; dan
- (b) berapakah jumlah kos perbelanjaan yang terpaksa ditanggung Kerajaan dalam mengurus isu ini.

Tuan Yang di-Pertua,

Berdasarkan laporan pemantauan Bahagian Kawalan Penyakit, Kementerian Kesihatan Malaysia (KKM) terhadap kejadian penyakit berjangkit di kalangan warga asing Malaysia, didapati lima (5) penyakit berjangkit yang utama iaitu secara umumnya adalah penyakit Tuberkulosis (TB), Hepatitis B, malaria, *human immunodeficiency virus* (HIV) dan kusta (leprosy).

Bagi penyakit TB, bilangan kes di kalangan warga asing ialah sebanyak 2,207 kes pada tahun 2008, 2,285 kes pada tahun 2009, 2,541 kes pada tahun 2010, 2,870 kes pada tahun 2011, 3,307 kes pada tahun 2012 dan meningkat kepada 3,426 kes pada tahun 2013.

Bagi kes Hepatitis B, bilangan kes di kalangan warga asing ialah sebanyak 93 kes pada tahun 2008, 90 kes pada tahun 2009, 208 kes pada tahun 2010, 425 kes pada tahun 2011, 1,264 kes pada tahun 2012 dan meningkat kepada 1,194 kes pada tahun 2013.

Bagi kes malaria, bilangan kes di kalangan warga asing ialah sebanyak 2,800 kes pada tahun 2008, 2,420 kes pada tahun 2009, 1,911 kes pada tahun 2010, 1,700 kes pada tahun 2011, 1,345 kes pada tahun 2012 dan sebanyak 1,150 kes pada tahun 2013.

Bagi kes HIV, bilangan kes di kalangan warga asing ialah sebanyak 187 kes pada tahun 2008, 166 kes pada tahun 2009, 298 kes pada tahun 2010, 297 kes pada tahun 2011, 373 kes pada tahun 2012 dan meningkat kepada 299 kes pada tahun 2013.

Bagi kes kusta, bilangan kes di kalangan warga asing ialah sebanyak 88 kes pada tahun 2008, 187 kes pada tahun 2009, 87 kes pada tahun 2010, 94 kes pada tahun 2011, 136 kes pada tahun 2012 dan meningkat kepada 107 kes pada tahun 2013.

Tuan Yang di-Pertua,

Mengikut rekod Kementerian Kesihatan Malaysia, dari tahun 2007 sehingga 31 Julai 2013, jumlah kos perbelanjaan yang terpaksa ditanggung oleh Kerajaan bagi menanggung tunggakan keseluruhan bayaran bil pesakit warga asing yang menerima rawatan perubatan di hospital-hospital dan fasiliti KKM di Malaysia adalah sebanyak RM104,225,419.28 juta dengan negeri Sabah merupakan negeri tertinggi yang mempunyai tunggakan bil pesakit warganegara asing iaitu sebanyak RM42,894,389.45 juta. Jumlah tunggakan bil di fasiliti KKM oleh warga asing daripada tahun 2007 sehingga Julai 2013 adalah jauh lebih tinggi (RM104,225,419.28) berbanding tunggakan oleh warga tempatan (RM86,546,027.91).

Kebanyakan pesakit warga asing selalunya memberi alasan tidak mempunyai wang untuk membayar deposit atau membayar bil hospital sebaik-baik sahaja mereka didiscaj. Mereka juga manafikan mempunyai waris atau majikan yang boleh menjamin mereka untuk membayar bil tersebut. Dalam pada itu, pihak hospital terpaksa juga memberikan rawatan perubatan yang sewajarnya atas dasar kemanusiaan, di mana semua pesakit yang hadir untuk mendapatkan rawatan di hospital patut diberi rawatan tanpa mengira status sosio-ekonomi mereka. Keadaan ini merupakan faktor utama yang telah menyebabkan berlakunya tunggakan bil di hospital-hospital KKM yang terpaksa ditanggung oleh Kerajaan.

Peningkatan kos rawatan terutamanya bagi kes penyakit berjangkit melibatkan peningkatan perbelanjaan negara kerana rawatan bagi penyakit berjangkit ditanggung sepenuhnya oleh Kerajaan.

Oleh yang demikian, KKM mencadangkan supaya pesakit warga asing membayar kos rawatan sebenar apabila mereka mendapatkan rawatan di fasiliti kesihatan KKM.

SOALAN (48)

**PEMBERITAHUAN PERTANYAAN
DEWAN RAKYAT, MALAYSIA**

PERTANYAAN : LISAN

TARIKH : 24 MAC 2014 (ISNIN)

**DARIPADA : Y.B. DATUK KOH NAI KWONG
[ALOR GAJAH]**

SOALAN :-

Y.B. DATUK KOH NAI KWONG [ALOR GAJAH] minta MENTERI KESEJAHTERAAN BANDAR, PERUMAHAN DAN KERAJAAN TEMPATAN menyatakan apakah tindakan yang akan diambil oleh Kementerian untuk membantu golongan berpendapatan rendah yang kekurangan sumber kewangan dan tidak mampu memperoleh kemudahan pinjaman bank untuk memiliki rumah mampu milik.

JAWAPAN :-

Tuan Yang di-Pertua,

Untuk makluman Ahli Yang Berhormat, Kementerian Kesejahteraan Bandar, Perumahan dan Kerajaan Tempatan (KPKT) boleh membantu dari segi menawarkan golongan berpendapatan rendah tersebut untuk menyewa rumah di bawah Program Perumahan Rakyat (PPR). Kadar sewa yang ditetapkan hanyalah RM124 sahaja sebulan. Sehingga 31 Disember 2013, Kementerian ini telah menyiapkan sejumlah 73 projek (67,467 unit rumah) PPR Disewa di seluruh negara bagi membolehkan golongan berpendapatan rendah ini menghuni rumah yang selesa.

Bagi golongan berpendapatan rendah yang mempunyai tanah sendiri dan tidak mampu memperoleh kemudahan pinjaman bank, mereka boleh memohon pinjaman perumahan di bawah Skim Pinjaman Perumahan di bawah Jabatan Perumahan Negara (JPN). Pinjaman yang ditawarkan adalah sebanyak RM45,000 dengan tempoh pembayaran balik pinjaman selama 30 tahun. Sehingga 31 Disember 2013, JPN telah meluluskan

sejumlah 8,425 permohonan pinjaman SPP kepada golongan berpendapatan rendah untuk membina rumah di atas tanah sendiri.

Bahagian Skim Pinjaman Perumahan, Jabatan Perumahan Negara menawarkan pinjaman bercagar dengan kadar faedah rendah 2% setahun kepada golongan berpendapatan rendah iaitu pendapatan isi rumah di antara RM 750 – RM 2,500 untuk membina rumah di atas tanah sendiri dengan had pinjaman maksima sehingga RM 45,000.00.

Kementerian Kesejahteraan Bandar,
Perumahan dan Kerajaan Tempatan

Mac 2014

**PEMBERITAHUAN PERTANYAAN
DEWAN RAKYAT**

PERTANYAAN : BAGI JAWAB LISAN

DARIPADA : DR. KO CHUNG SEN (KAMPAR)

TARIKH : 24 MAC 2014 (ISNIN)

SOALAN : 49

Dr. Ko Chung Sen [Kampar] minta MENTERI PENGANGKUTAN menyatakan:

- a) bilangan motokar di jalan raya dan peratusan motokar ini yang lebih tua daripada 10 tahun, 20 tahun, dan 30 tahun bagi tempoh 5 tahun yang lepas; dan
- b) peratusan kemalangan yang melibatkan motokar yang lebih tua daripada 10 tahun, 20 tahun dan 30 tahun.

JAWAPAN

Tuan Yang di-Pertua,

Bilangan motokar (kereta) di jalan raya yang berusia di antara 10 hingga 30 tahun bagi tempoh 5 tahun yang lepas dan peratusannya adalah seperti berikut:

USIA KENDERAAN (TAHUN)	TAHUN									
	2009	%	2010	%	2011	%	2012	%	2013	%
10	294,942	8.6	358,632	9.7	421,985	10.5	445,776	10.2	443,917	9.4
11 hingga 20	2,161,187	63.2	2,331,918	62.9	2,514,073	62.4	2,740,336	62.8	3,037,787	64.6
21 hingga 30	965,651	28.2	1,014,093	27.4	1,089,395	27.1	1,176,622	27	1,218,324	26
JUMLAH	3,421,780	100	3,704,643	100	4,025,453	100	4,362,734	100	4,700,028	100

Tuan Yang di-Pertua,

Berdasarkan rekod yang diperolehi daripada MROADS (MIROS Road Accident Analysis & Database System), terdapat 642,157 buah kenderaan yang terlibat dalam kemalangan jalan raya pada tahun 2012. Daripada jumlah tersebut, hanya 477,637 buah kenderaan yang mempunyai rekod tahun dibuat (*vehicle made-year*) di mana 73.53% atau 351,187 buah adalah merupakan kenderaan jenis motokar (kereta). Perinciannya adalah seperti berikut:

	0-5	6-10	11-15	16-20	21-25	26-30	Jumlah
Bilangan	333,180	9,784	5,161	2,042	696	324	351,187
(%)	94.87%	2.79%	1.47%	0.58%	0.20%	0.09%	100%